

經律異相卷第二十七

羅七

梁沙門僧旻寶唱等奉勅撰

行菩薩道諸國王部第十九之三

波羅柰王得辟支佛一

月氏王造三十二塔成羅漢道二

羅七

摩訶劫賓寧王伐舍衛遇佛得道三

有德王擁護弘法法師失命爲佛弟子四

功德莊嚴王請佛得道五

藍達王因目連悟道六

普安王化四王聞法得道七

婆羅門王捨於國俸布施得道八

摩達王從羅漢聞法得道九

捷陀王捨外習內得須陀洹道十

普達王遇佛得道十一

波羅柰王得辟支佛第一

波羅柰國王夏暑熱時處高樓上坐七寶牀
令青衣摩牛頭栴檀香塗身青衣臂多著釧
塗王身時釧聲滿耳王甚患之教次第令脫
釧唯獨一釧寂然無聲王時悟曰國家臣民
姝女多事多惱亦復如是即時離欲獨處思
惟得辟支佛鬚髮自落著自然衣從樓閣去
以己神足力出家入山如是因緣中品辟支
佛也有人願作辟支佛種此善根時世無佛
法善根熟爾時厭世出家得道名辟支佛

出坐

經中卷

月氏王造三十二塔成羅漢道第二

月氏國王欲求佛道故作三十二塔爲供養
相一一作之至三十一時有惡人觸王王心
退轉如此惡人云何可度即時迴心捨生死
向涅槃作第三十二浮圖以求解脫由是因

緣成羅漢道是故此寺名波羅提木叉

此言解脫

自爾以來未滿二百年此寺猶在吾亦見之

出雜藏經

摩訶劫賓寧王伐舍衛遇佛得道第三

舍衛國王名波斯匿于時南方有國名曰金

地其王字劫賓寧太子名摩訶劫賓寧父崩

太子即位體性聰勇領三萬六千小國威風

遠震莫不摧伏然與中土不交通後有商

客往到金地以四端細氎奉上彼王王問商

客言此物甚好爲出何處啓曰出於中國王

復問言其中國者號字云何答曰名羅悅祇

又名舍衛王復問言中國王以何等故不來

獻我又答曰自霸王威名相齊故不來耳王

自思惟今當加威令彼率伏復問商客中國

諸王何者最大白言舍衛國王爲第一大即

便遣使詣舍衛國持書示教其理委備告語

其王波斯匿言我之威風徧閭浮提卿何所

恃斷絕使命今故遣使共卿相聞却後七日

與我相見設不如是吾當興兵破汝國界波

斯匿聞深用驚惶即往詣佛具白斯事佛告

王言還語使云我不大更有大王王奉佛教

告彼使言世有聖王近在此間卿可到邊傳

汝王命使即詣祇洹于時世尊自變其身作

轉輪王七寶侍從皆悉備有使前入化城旣

覩大王情甚驚悚以書與之化王得書踰著

脚下告彼使言吾爲大王臨領四域汝王頑

迷敢見違拒汝速還國致宣吾教信至之日

馳奔來覲卧聞當起坐聞應立剋期七日不

得稽遲敢違斯制罪在不請使還本國具以

聞見白金地王王承斯問深自咎責合率所

領諸小王輩欲朝大王未便即路先遣一使
白大王言臣所總御三萬六千王爲當都去
將半去耶大王還報聽半留住但將半來時
金地王將萬八千小王同時來到既見化王
謁拜畢已心作是念大王形貌雖復勝我力
必不如化王于時勅典兵臣以弓與之金地
國王手不能勝化王還取以指張弓復持與
之勅令再挽金地國王殊不能挽化王復取
而彈扣之三千世界皆爲震動次復取箭彎
弓而射離手之後化爲五發其諸箭頭皆出
光明其光明頭皆有蓮華大如車輪一一華
上各各皆有一轉輪王七寶具足奮出光明
普照三千大千世界五道衆生莫不蒙賴諸
天境界見其光明及聞說法身心清淨有發
無上正真道意復有得住不退地者人道衆

生有得一道二道三道之者出家入要得應
真者有發無上正真道意得不退地不可稱
計三塗衆生離苦解脫生人天中時摩訶劫
寶寧王及金地諸小王見斯神變其心信伏
遠塵離垢得法眼淨萬八千小王一時皆然
須臾之頃佛攝神力還復本形諸比丘僧前
後圍繞金地王衆求索出家鬚髮自墮袈裟
在體思惟妙法盡得羅漢出賢愚經第七卷
有德王擁護弘法法師失命爲佛弟子第四
過去遠劫此拘尸城有佛出世號歡喜增益
住世無量化衆生已然後乃於娑羅雙樹入
般涅槃佛涅槃後遺法住世無量億歲餘四
十年佛法未滅有一持戒比丘名曰覺德多
有徒衆眷屬圍遶能師子吼廣說經典制諸
比丘不得畜養奴婢牛羊非法之物時多破

戒比丘聞作是說皆生惡心執持刀仗逼是法師是時國王名曰有德聞是事已爲護法故即便往至說法者所與是破戒諸惡比丘極共戰鬪令說法者得免危害王時被瘡舉身周徧覺德比丘尋讚王言善哉善哉王今真是護正法者當來之世此身當爲無量法器王於是時得聞法已心大歡喜尋即命終生阿閼佛國作第一弟子其王將從人民眷屬有戰鬪者有隨喜者一切不退菩提之心命終悉生阿閼佛國覺德比丘却後壽終亦復往生阿閼佛國作聲聞衆中第二弟子若有正法滅時應當如是受持擁護時王者則我身是說法比丘迦葉佛是

出大涅槃經第三卷

功德莊嚴王請佛得道第五

爾時功德莊嚴王從佛聞說偈及覩神變增

益堅固菩提之心頂禮佛足而白佛言唯願世尊及菩薩弟子大衆受我八萬四千歲請普明王如來願以衣被飲食卧具醫藥給侍所須彼佛及大衆即便受請王知佛受其請已歡喜便去王子師子進及二萬王子捨世榮位於佛法中剃除鬚髮出家修道勤行精進樂求善法時師子進得五神通堅固不退彼佛加其威神常爲衆生顯說妙法遍三千大千界施作佛事無量衆生堅固不退無上大乘功德莊嚴王於八萬四千歲中以諸樂具供養世尊及諸大衆與一切羣臣前後導從爲聽法衆而作是念我諸子等剃除鬚髮出家修道常受供養自不可行施亦未見得過人之法寧可還家捨財布施修諸功德如我所種諸善根耶爾時普光明王如來即知

功德莊嚴王心所念告師子進菩薩言善男子現汝自在功德神力大菩薩變現使此大衆普得見聞迴彼邪心使得正見師子進菩薩即時入定現如是等相大千震動於上虛空雨華香繒蓋幢幡妓樂美饌飲食瓔珞衣服種種珍寶紛紛而下滿足大千衆生得未曾有皆大歡喜爾時從地神諸天上至阿迦膩吒皆唱是言此大菩薩可名虛空藏所以然者從虛空中能雨珠寶充足一切即時印可王見踊悅得未曾有捨憍慢心合掌向佛作如是言希有世尊菩薩功德智慧乃能如是世尊在家施者所益無幾夫出家者以神通力施無涯際在家者施不稱彼意雖施猶悋以爲苦惱出家不悋不生苦惱王捨位與子吉意以眞信心剃除鬚髮於佛法中出家

修道增長善法常勤精進修得四禪四無量心及五神通時吉意王以法治化國無怨者精進不疲供養世尊功德莊嚴王者拘留孫如來是師子進菩薩者即虛空藏菩薩是吉意王者今彌勒是也

出功德莊嚴王請佛供養出家得道經

藍達王因目連悟道第六

舍衛有王號曰藍達土地豐沃人民淳信君臣父子相率以道後王即位法俗轉薄治行不平苛枉百姓橫誅無辜正亂禍應雨澤不時五穀不豐互生妖怪遂致荒殘懼於危亡奉事邪道五百餘人又祀妖神上下相敬如風靡草黎民樂亂競爲姦宄强者陵弱更相傷殺劫奪人財不從道理姪他婦女君臣荒醉迷惑日滋旱踰三年前後請禱初不得雨諸師白王今當大祠應用童男七人白牛白

馬各十頭燒以祭天然可獲雨王即辦具國中凶大小搔擾佛告目連藍達國荒人民勤苦有三億人應從汝得解可往開化目連即往爲說法要開解其意國中人民初無受者目連化作大鬼神身長數十丈當城門坐羅七洪聲呼王及諸近臣使出君臣惶惑自懼不全王即率將近臣叩頭自陳唯願生活神謂王言急求臣不忠子不孝者來吾欲食之王即推問答言無有神復謂王言急求偷盜者姪洸者兩舌惡口者吾欲食之王即推問又答言無神復謂王言急求飲酒者吾欲食之王即推問又答言無於是目連復現真身往與鬼神共語王見目連叩頭守請令爲解釋大神目連謂王言是神欲何所求王言欲食惡人目連問言國中信有此輩人不王答言

無願請發遣我當終身歸命道人目連語大神言此國中人民無有卿所覓者卿可原赦其罪若復有犯者可更來食之神即聽其言忽然而去王及臣民即俱叩頭陳謝乞得歸命目連告言王若欲歸命者宜先自歸佛王問佛功德目連說佛三界獨尊所說之法聲聞三千王言吾今有幸乃獲異聞即啓目連願欲請佛受尊法言終身奉行目連告王信能爾者其福難量但當淨心存佛王即承教沐浴齋戒遙向佛國稽首爲禮曰吾以闇昧誤處民上不能洗心率導使國空荒咎在吾身唯願天尊垂光降下普令黎民獲無盡之福佛與諸比丘未至百里預行空中五色蓮華捧其足下諸天翼從寶帳華蓋奉迎道路作衆名樂側塞空中覩佛威神光耀天地王

及羣臣稽首足下於四衢道廣施帳幕掃灑
淨潔佛坐自然師子之座悉布以天繒綰經
王手斟酌飲食躬行澡水呪願畢佛便說苦
空非常四諦之要王即歡喜乞受五戒結解
垢除得須陀洹時王所事五百外道乞爲比
丘佛即聽之以手摩其頭頭髮墮落袈裟著
身却後七日同得羅漢衆會人民得須陀洹
或受五戒勸行十善歸命三尊月六齋歲三
齋轉相率導以爲常法阿難白佛此王人民
宿與目連有何等緣佛言昔維衛佛時目連
爲優婆塞居宿貧窶奉行戒行守意不毀採
華山中見須文樹適欲上樹取華不知前有
蜂房羣蜂數千驚散逐之即心念言若我得
道當度汝等今日得道者皆爾時蜂也

經

出藍達王

普安王化四王聞法得道第七

昔有五國王國界比近共作善友更相往來
其最大者名曰普安習菩薩行餘四小王常
習邪行大王愍之呼來上殿共相娛樂乃至
七日終日竟夜七日已滿小王白大王言國
事甚多請退還家大王送之出至道中語諸
小王各說所樂一王答曰陽春三月樹木榮
華遊戲原野一王復答願我常作國王鞍馬
服飾官屬人民圍遶左右晃晃昱昱椎鐘鳴
鼓出入行來路人傾目一王又言願好婦兒
端正無雙共相娛樂極情快意一王復言願
我父母常在朋友兄弟妻子羅列好衣美食
以恣身口素琴青衣共相娛樂俱白大王所
樂何事大王答言我樂不生不死不苦不惱
不飢不渴不寒不暑存亡自在四王俱言如

此之樂當有明師大王答言吾師號佛近在祇洹精舍諸王歡喜同詣世尊大王白佛言今得爲人闇鈍無智但深著世樂不知罪福願佛爲弟子等說其苦諦佛言卿等善聽當爲說之人生在世衆苦切身略說八苦一生苦人死時不知精神趣向何道未得生處普受中陰之形至三七日中父母和合便來受胎一七日如薄酪二七日如稠酪三七日如凝酥四七日如肉嚮五成就圯風入腹吹其身體六情開張在母腹中生臟之下熟臟之上母取一粒熱食灌其身體如入鑊湯母飲一杯冷水亦如寒冰切體母飽之時迫迫身體痛不可言母飢之時腹中了了亦如倒懸受苦無量至其滿月欲生頭向產門劇如雨山夾石生墮落草上身體細軟草觸其身

如履刀劒忽然失聲大呼此是苦不答言是苦二者老苦父母養育至年長大飢時極飢飽時極飽無有節度漸至年老頭白齒落目視茫茫耳聽不聰盛去衰至皮緩面皺百節疼痛行步苦極坐起呻吟憂悲苦惱識神轉滅便旋即亡命日促盡言之流涕坐起須人此是苦不答曰實苦三病苦地水火風和合成身一大不調百一病生四大不調四百四病同時俱作地大不調舉身皆痛水大不調舉身洪腫火大不調舉身苦熱風大不調舉身僵硬百節苦痛猶被杖楚四大進退手足不任氣力虛竭坐起須人口燥唇焦筋斷鼻垢目不見色耳不聞聲不淨流出身卧其上心懷苦惱言輒悲哀六親在側晝夜看視初無休息甘美飲食入口皆苦此是苦不答曰

實苦四死苦人死之時四百四病同時俱作
四大欲散鬼神不安欲死之時刀風解形無
處不痛白汗流出兩手摸空室家内外在其
左右憂悲啼哭痛徹骨髓不能自勝風去氣
絕火滅軀冷魂靈去矣身體挺直無復所知
旬日之間肉壞血流臃腫臭甚不可近棄
之曠野衆鳥噉食肉盡骨枯髑髏異處此是
苦不答言實苦五恩愛別苦室家内外兄弟
妻子共相戀慕一朝破亡爲人抄劫各自分
張父東子西母南女北非唯一處爲人奴婢
各自悲呼心內斷絕杳杳冥冥無有相見之
期此是苦不答曰實苦六求不得苦家有財
物散用求官望得富貴求之不止會遇得之
得作邊職未經幾時貪取民物爲人所言一
朝有事檻車載來憂苦無量不知死活何日

此是苦不答曰實苦七怨憎會苦世人薄俗
居愛欲之中諍不急之事更相殺害遂成大
怨各自相避隱藏無地各磨刀箭挾弓持仗
會遇狹道張弓擣箭兩刃相向不知勝負是
誰當爾之時怖畏無量此是苦不答曰實苦
八憂悲惱苦人生在世長者百歲短命胞胎
傷者墮落縱得百歲夜消其半餘五十年醉
酒疾病不知作人小時愚癡十五年中未知
禮儀年過八十老鈍無智耳聾目冥無復法
則天下欲亂旱火大霜田種不熟室家内外
多諸疾痛治生喜失官家百調閉繫牢獄未
知出期兄弟兒子遠行未歸居家窮寒無有
衣食比舍村落社稷不辦家人死亡無可殯
殮春時種作無有犁牛節日共聚應當歡喜
共悲相向此是苦不答曰實苦於時五王及

諸羣臣會中數千萬人聞說苦諦心開意悟
即得須陀洹道今觀宮殿如視穢廁無可樂
者即捨王位付弟出家爲道修諸功德日日

不倦

出五
王經

婆羅門王捨於國俸布施得道第八

多昧國有婆羅門王捨其王俸多事異道王
欸一日自發善心欲大布施如婆羅門法積
寶如山有來乞者令其自取手重一撮如是
數日其積不減佛知是王宿福應度化作梵
志往到其國王出相見禮問起居曰何所求
索莫自疑難梵志答言吾從遠來欲乞珍寶
持作舍宅王言大善自取重一撮梵志取一
撮行七步還著故處王問何故不取梵志答
曰此裁足作舍廬耳復當取婦俱不足用是
以不取王言更取三撮梵志即取行七步復

還著故處王問梵志何以復爾答言此足取
婦復無田地奴婢牛馬計復不足是以息意
也王言更取七撮梵志即取行七步復還著
故處王言復何意故梵志答言若有男女當
復嫁娶吉凶用費計不足用是以不取王言
盡以積寶持用相上梵志受而捨去王甚怪
之重問意故梵志答曰本來乞匄欲用生活
諦念人命處世無幾萬物無常旦夕難保因
緣遂重憂苦日深積寶如山無益於已貪欲
規圖唐自勤苦不如息意求無爲道是以不
取王意開解願奉明教於是梵志現佛光相
踊住空中爲說偈言

雖得積珍寶 嵩高至于天 如是滿世間
不如見道要 不善像如善 愛而似無愛
以苦爲樂像 狂夫不爲猷

王見佛光遠照天地又聞此偈踊躍歡喜王及羣臣即受五戒得須陀洹道

出曜經第十六卷

摩達王從羅漢聞法得道第九

有國王名曰摩達出軍征討選民數百萬時

比丘得羅漢道入國分衛並被執錄將詣王

官王使養官馬勤苦七日王自臨視比丘見

十三

王輕舉飛翔上住空中現其威神王便恐怖

叩頭悔過我實愚癡不別真僞推問內外誰

令神人爲是事者今當有所治殺比丘告王

非王及國人過也自我宿命行道常供養師

我時爲師設飲師謂我言且先澡手然後當

飲我愚癡心念言師亦不養官馬何故不預

澡手師即謂我言汝今念此輕耳後重如何

我聞是語便自愁憂師知其意便念言我會

當泥洹何故令人惱耶即以其夜三更師般

泥洹從來久遠各更生死今用是故受其宿

殃養馬七日夫善惡行輒有殃福如影隨形

王聞比丘說罪福意解歡喜乞得歸命於神

人比丘告言卿當自歸於佛佛爲三界師王

及國人皆隨比丘出到佛所稽首作禮奉受

五戒作優婆塞佛便爲王及國人民現相好

威神光曜天地復爲說非常苦空王於是時

得須陀洹道國中人民皆受五戒十善歸命

三尊月月齋戒以爲常法

出佛說摩達國王經

捷陀王捨外習內得須陀洹道第十

時有國王名曰捷陀奉事婆羅門居在山中

多種果樹樵人毀樹時婆羅門將詣王所言

其無狀殘敗果樹請王治殺王敬事婆羅門

即爲殺戮自從未久有牛食人稻其主逐捶

牛折一角血流被面痛不可忍牛徑到王所

白言我實無狀食人少稻今捶折我角王曉
鳥獸語王告牛言我當爲汝治殺之牛言雖
殺此人不止我痛但當約勒後莫苦人王便
感念我事婆羅門但坐果樹令我殺人不加
此牛也便呼婆羅門問言今事此道有何福
乎婆羅門報言^{第七}可得懷災致富富貴長壽王
復問言可得脫於生死不報言不得免於生
死也王到佛所五體投地爲佛作禮白言我
聞佛道至尊教化天下所度無數願受法言
以自改革佛即授王五戒十善爲說一切天
地人物無生不死者布施持戒現世得福忍
辱精進心行智慧者其德無量後生天上亦
可得作遮迦越王可得無爲度世之道佛現
相好威神光耀王歡喜意解得須陀洹道牛
後七日壽終上生天上

出提陀
國王經

普達王遇佛得道第十一

有夫延國王名曰普達身奉佛法未嘗偏枉
常有慈愍國內愚民不知三尊每當齋戒登
高觀視還必頭面稽首爲禮國中臣民怪王
如此自共議言王處萬民之尊遠近敬伏登
位人從有何請欲毀辱威儀頭面著地羣臣
欲諫不敢與吏民數千出宮未遠見一道人
王下車却蓋住其群從爲之作禮尋從而還
施設飯食遂不成行群臣諫言大王至尊何
宜於道路爲此乞勾道人頭面著地天下尊
貴唯^{第七}有頭面加爲國主不與他同王勅臣下
求死人首及六畜頭臣下徧索歷日乃得王
言於市賣之臣下賣之牛馬豬羊頭皆售但
人頭未售王言貴賤賣去如其不售便以勾
人如是歷日賣既不售勾無取者頭皆腥臭

王便大怒語臣下言卿言人頭最貴不可毀辱今人頭何故勾無取者即勅嚴駕出曠澤中當有所問羣臣震聳出到城外告羣臣言卿寧識吾先君時有小兒常執持蓋者不臣下對曰實識王言今此兒何所在對曰亡已十七年王言此兒爲人善惡何如對言臣等常觀其承事先王齋戒恭肅誠信自守非法不言王告諸臣今若見此兒在時所著衣服寧識之不諸臣對曰雖自久遠臣故識之王使取前亡小兒衣曰此寧是不臣下對曰是王曰今儻見兒身爲識之不臣下良久對曰臣自懼蔽闇卒覩不別前所見道人來王甚大歡喜又爲道人賣頭勾人不取今欲示其本末有幸相遇願爲開導道人即爲臣下說王本是先王時執蓋小兒常隨先王齋戒奉

行正法清淨守意不犯諸惡其後過世生爲王子今得尊貴皆由宿行齋戒所致臣下大小莫不僉曰吾等幸遇得覩道人願哀愚蒙乞爲弟子道人告諸臣民吾有大師當從受問諸臣報言願盡年命一受法言道人曰我師號佛身能飛行項有光明分身散體變化萬端獨步三界莫與齊倫門徒清潔皆爲沙門其所教授度脫不虛臣下即啓道人佛寧可得見不去此幾何道人報言甚善當啓世尊十六六千餘里道人即飛到舍衛具以啓佛佛言明日當到夫延國臨至皆現威神王及羣臣持華香出城迎佛覩佛威靈喜懼交并五體投地稽首爲禮白佛言勞屈世尊并及衆僧遠到此土王盡心供設手自斟酌行澡水呪願畢佛笑口光五色阿難言佛不妄笑答

